

# Polo Tesalonika Firampor Manénkir Kumwimp Kar

Mekia Akwapnámp Kar

Jisaso pok tenánko, 20 yopwar niamp arake fek Polo taun Korin mek yakria, Masedonia mekamp taun Tesalonika mekamp siosén mámá pas kumwimpono. Arop ankwap fárakap te Polo mámá pas manénkir kumwi námprá ninik napon.

Mao yininkan yáarak námpe fek taun Filipai pwarará akwapea Tesalonika mek Kwaromp Kwapwe Kare Kar farákáp nánko, kápae kare arop maomp kar wawia Kristen napon. Aenapo, Juda ankwap fárakap am nkea kokwarokria Polén mwaria napo, Kristen fárakap man sámp-kérép napo, mao Korin mek akwapámpono.

Ankwap arop fárakapao am Kristen fákárean sámpá yampourou napo, am fárakapao Kwarén kárakáre fek méria, nonopok nounourou napan Polo wawia, Kwarén 'Aesio'rá sénámpon. Tá ankwap te, am Kristen fárakap 'Jisas arákarrá korop námpe fek sumpwinap arop ferámp mwanap mér moria, am te mokop naenámpon?'rá turunk napo, Polo nopok Jisas mokopia ékia man mérap aropan éréképea pok naenámpan érik sénámpon. Tá mao am fek sérrá, 'Yumo yae-párak kare ninik fek yakáprá nánap kip'rá sénámpon.

**1** <sup>1</sup>Taun Tesalonika mek yakápnep sios koumteouráp arop e! Yino Pol, Sailas, Timoti, makia yino má pas má kumwia yumo Naropwar Kwar ntiaka Jisas Krai Tokwaerént koumpá yakáp nap, yiráp por kérépreano. Ono ninik namp te, Kwaro yumwan ninikia yaewouria yumwan yonkwae porokwe sánk nánko, yumo yonkwae porokwe fek yakápenkria nampon.

**Tesalonika mekamp aropao Kwarén méria yae-párak yakápnep kar**

<sup>2</sup>Yino te ankár kápae kare por yumwan ninikrá Kwarén aesioria, kar toropwap námpe te, yiráp e kouroumpea Kwarén sér i konámpono.<sup>a</sup>

<sup>3</sup>Yino yumo Kwarén mér nap fek kwapwe kare ninik sámprá, yumo arop ankwapan yonkwae touwe nap fek táman térea waeria, nomp Jisas Krai Tokwae Karantá yépék te pwar mo napan Kwarén sénámpe te kokwae mo i konámpono. <sup>4</sup>Kémpiyae tárápu, yino wae mér námpon: Kwaro yumwan

---

<sup>a</sup> 1:2 Fl 1:3-4

nouroupria náráponoria nánkáráp námpara, yumo te ankár maomp karenono.

<sup>5</sup>Am fi te ará: Yino sankoropea farákápnámp Kwapwe Kare Kar máte kar mwar farákáp námpanápe, mono. Máte ankár Yiki Kor Spiritao yoronámp kárákáre méntér akwap nángo, yumo am kar te kare karonoria mér kare napon. Yino yumont yae-párák yakáприя yumwan yaewourinámp kwapwe kare ninik te yumoku wae mér napon.<sup>b</sup>

<sup>6</sup>Yumo wae Kwaromp kar wa napo, am fek yumwan kápae kare touwe korop námpan maok, yumo Yiki Kor Spiritao sánknámp warákár sámpea, yino i konámp ninikaok, tá Tokwae Karaoinámp ninikaok napon.<sup>c</sup>

<sup>7</sup>Aenánko maok, yumo yiráp ninik kwapwe am te Kwarén mérnáp arop apár fi Masedonia ntiaka Akaia mekamp aropan yénkép napon.<sup>d</sup>

<sup>8</sup>Kwaromp kar yumo farákáp nap te Masedonia ntiaka Akaia me saráp wa mono, waeman némp-némp akwap nángo, yumo Kwarén mérnáp kar wae wa napara, yino te ampok tukupea kar farákáp mwanámp tére yak mono.<sup>e</sup> <sup>9</sup>Am arop fárákapao yumo mér napan yinan arakrá sér, ‘Yino yumonapok tukup nángo, yumoku karerao yinan, yumo fwaprá korop naponoria warákárria yinan farákáprá, “Yino te wae kwekár kwar pwararea yiki yak konámp Kwar kareaonámpok tukupria, Kwaromp tére konámp arop yakáp mwaria námpon”rá séri nap’rá séri napon. <sup>10</sup>Te am fárákapao sérrá, ‘Yumo Kwaromp Táráp Jisas Kwaro apár me mekamp fárámpá papámp te, warko yámar meknámp ék naenámpria yumo yépékrá yakáp napara, Kwaromp yonkwae pwarámp wakmwaek korop naenámp mekamp yumwan Jisaso érékép námp’an sénapon.<sup>f</sup>

### Polo Tesalonika mek téremp kar

**2** <sup>1</sup>Ankwapyae fákáre, yumoku te wae mér napon, yino wokwaek kar yumonapok tukupeaka téremp te am tére kwaporok moyak mono. <sup>2</sup>Yumo te waeman mér napon, yino oukoumwan yumonapok korop mo, Filipai mek yakáprá tére námp fek, yinan touwe sáприя yinan wouroump napon. Aeapan maok, yino yumonapok korop námp fek te, Kwaro yinan kárákáre sáp nángo, arop ponankor yinan taokorapan kuri, kwe-pwararea pirikímp mono, kárákáre fek fokopeyakáprá yumwan Kwaromp Kwapwe Kare Kar farákápámpon.<sup>g</sup> <sup>3</sup>Yino yumwan Jisasén mérenkria farákápnámp kar máte yino ankwap ninik mek yak nángo, poupwekáприя épérépnámp ninikaokria farákápnámp kar mono. <sup>4</sup>Kwar námoku yinan nkea younkoupia sérrá, ‘Fwap náráp Kwapwe Kare Kar farákáp mwanap’ ri tari námpara, yino am kar táman farákáp námpon. Apae aropao yinomp tére nkea warákár mwanapria tére námpanápe.

<sup>b</sup> 1:5 1 Ko 4:20   <sup>c</sup> 1:6 2 Te 3:9   <sup>d</sup> 1:7 1 Pi 5:3   <sup>e</sup> 1:8 Ro 1:8   <sup>f</sup> 1:10 Mt 16:27  
<sup>g</sup> 2:2 Ap 16:19-24

Kwaro námoku yinomp ninik youroukoupia mao saráp yino térenámp warákár naenámpon.<sup>h</sup> <sup>5</sup> Yumo te wae mérapono: Yino te yiráp ankank sámp mwaria kikiankrá kar porokwerá kar farákáp mono. Kwar námoku yinomp ninik mek youroukoupia mér námpon.<sup>i</sup> <sup>6</sup> Tá kare, yino te Kraisomp aposel yakáp námpan maok, yino te yumo, tá arop ankwap fárakapao kor yinan e tokwae sápenkria tére mono.<sup>j</sup> <sup>7</sup> Yino yumont yakria yumwan taokeyak námamp te éntupwaro tárápuan porokwe fek taokeyak námpnámp araknámp námpon. <sup>8</sup> Yino te yumwan yonkwae touwe námamp kwamp maok, yino yumwan Kwaromp Kwapwe Kare Kar má farákáp námpon. Am táman saráp mono. Yino te yumwan yaewourrá sumpwi mwanámp nánamp námpon. Am te apae riteanápe, yumo yinomp nouroup kar yakáp napantá námpon.

<sup>9</sup> Ankwapyae tárápu, yino yumont yakáp námamp fek kápae kare térea wae námamp te yumo wae mér napon. Yino te ‘Yinan fir sápenk’rá sérantá námamp kwamp, yinoku kor Kwaromp Kwapwe Kare Kar farákáприя maok, yinokump ankank mént térerá paokopria, wae fek, tá kumuruk kor mént térea wae námpon.<sup>k</sup>

<sup>10</sup> Yumo te waeman mér, tá Kwaro kor yino Kwarén mérnamp arop yumwan tére námamp te wae mér námpon. Yino am yumwan yaewourrá térenámp ninik te yae-párak kareria yiki kukur námpara, kwatae ninik moi námpon. <sup>11</sup> Yumo te waeman mér napon, naropwaro náráp tárápuran taokeyakrá fwapokwap i konámpnámamp taknámamp, yino kor yumwan ankákárankrá yiráp ninik fwapokwapria, kárakáre sámpenkria farákáprá sénámpon.<sup>l</sup> <sup>12</sup> Kwar te yumwan mao náráp firáp taokeyak námamp mek koropeaka nomont yámar mek wae kwapwe sámp mwanapria wumwi námpon. Aenámpara, yino yiráp ninik mek kárakáre sánkria fopwaokrá, ‘Ankár Kwaromp ninik pwi yaknámpaok saráp paokopenk’ ria sénámpon.<sup>m</sup>

### **Tesalonika mekamp Kristen fákárerao Kwarén méria kárakáre fek fokokeyakápnamp kar**

<sup>13</sup> Tá yumo yino Kwaromp kar farákápánko wawia mér napantá, yino Kwarén aesiorá saráp yakáp konámpon. Am yumo sámpnap kar te aropamp kar niampán sámp mono, Kwaromp kar kare karan wa napara, am kar támao Kwarén mérnamp arop fárakap yiráp ninik mek tére kárakáre námpon.<sup>n</sup> <sup>14</sup> Onomp ankwapyae fákáre, yumo te Judia mek yakápnamp sios fákáre Krais Jisasén méria, Kwaromp koumteouráp arop fárakap yakápiap niamp napon. Am fárakap te Juda fákáreramp yae kor fek touwe sámpap niamp, yumo kor taknámamp yiráp némpoukamp arop

<sup>h</sup> 2:4 Ga 1:10    <sup>i</sup> 2:5 Ap 20:33    <sup>j</sup> 2:6 Jo 5:41,44    <sup>k</sup> 2:9 1 Ko 4:12    <sup>l</sup> 2:11 1 Ko 4:14

<sup>m</sup> 2:12 Fl 1:27    <sup>n</sup> 2:13 Ga 1:11-12

ankwap fárakapamp yae kor fek touwe sámp napon.<sup>o</sup> <sup>15</sup>Am Juda fi te profet fákáreran tirá wouritea, tá Jisas Tokwaeran sámp-wouroumpea napan, yinan kor yérépe napon. Am taknap ninik te Kwaro warákárnámp ninik kwe-pwararea, kápae kare aropan kor yopor napon.<sup>p</sup> <sup>16</sup>Am fárakap te yinan kor arop ankwap firan Kwaro warko érékép naerianámp kar fárakáp mwarianánko, mwae kákar napon. Am tak nap te, kápae kare por takrá tukup napo, am fárakapamp kwatae ninik akwapea tokwae kari yak nánko, Kwaromp yonkwae pwarámp am fárakapamp pourouk koroepa yakanoria napon.<sup>q</sup>

#### **Polo warko Tesalonika mek akwap naeria ninik tokwaenámp kar**

<sup>17-18</sup>Aeno ono yinoku tére námpan sénae rae: Onomp arop fákáre, yino yumont yakáp mwarianánko, Juda firao yinan yérépeapo, yino fae tákáre ke fek yumwan pwar korop námp fek yino kweri tárápu arákari námpon. Kareno, yino te yiráp pourou kare nke mwanámpan maok, yinomp ninik te yumont yak námpon. Aeria yino yumwan koropá nke mwaria kárakárerá mwae kup oupourouk námpon. Onoku kor korop naeriaka nkwakár korop nae, makár korop naeriaka, ninikrá yarak nanko, Satano yinan taokorámpon. <sup>19</sup>Nánkár nomp Tokwae Kar Jisas éknámp ke fek te, apae ankankao yinan yaewour nánko, kárakáre fek fokopeyakria, mao nke námp fek warákár mwanámpon? Yino te apae ankank maonámpok santukup nánko, am támao yino yae-párak tére námp yénkép naenámp? Yino am tére námp fek sámp mwanámp te yumo támaono.<sup>r</sup> <sup>20</sup>Ye, yumo támao maok yinomp e tokwae sámpria warákár mwanámp támaono.

#### **Polo Timotin Tesalonika mek sámp-kérépnámp kar**

**3** <sup>1</sup>Yino yumonapok korop mwarianámpao, mapek saráp yakrá yépék te kokwae námpantá, Sailas yino mwar Atens mek mamek yakriaka,<sup>s</sup> <sup>2</sup>yino yiráp nouroup Timoti sámp-kérép nenko, akwapea yumo Kwarén mérnep yaewourria kárakáre nénkanoria nempon. Mao te yinont Kwaromp téreria Kraisomp Kwapwe Kare Kar fárakáp konámp aropono. <sup>3</sup>Takria yumo ankwap fárakap, arop ankwap fárakapao yumwan nkwakwe make sokoro napo, am táman nkea apápriaka Kwarén mér napan pwarantánoria nampon. Yumo te wae mér napon, am te Kwaro yumo am táman sámpenkria ninik námp támaono.<sup>t</sup> <sup>4</sup>Yino yumont yakriaka ‘Yumwan wakmwaek nkwakwe make sokoro mwanap’rá sérimp te, am támao yumwan kare korop nánko, yumo wae mér napon.<sup>u</sup> <sup>5</sup>Aeria námp kwamp, ono te warko yépék mono. Ono Timotin sámp-

<sup>o</sup> 2:14 Ap 17:5   <sup>p</sup> 2:15 Ap 2:23   <sup>q</sup> 2:16 Ro 1:18   <sup>r</sup> 2:19 Fl 4:1   <sup>s</sup> 3:1 Ap 17:15

<sup>t</sup> 3:2-3 Ap 16:1; 2 Ti 3:12   <sup>u</sup> 3:4 Ap 14:22

kérép nanko, akwapá yiráp mér nkea warko arákarrá koropea onan sénaenámpria nampon. Satano yumwan kwekár nánko, yino tére námp kwaporok akwapá moyakantáno.’

**Timoti kar kwapwe sankoropá sénánko, Pol warákarimp kar**

<sup>6</sup>Tá Timoti wae arákarrá koropea yinan yumo Kwarén mérnáp kar kwapwe, tá arop ankwapan nounouroup i konap ninikan farákáp námpon. Tá mao yinan sérrá, “Yumo yinan ninikria warákárria yinan nke mwaria ninik nap te, yino kor yumwan nke mwaria ninikimpnámptaknámpt napon.”<sup>w</sup> <sup>7</sup>Ankwapyae fákáre, yino te nkwa kwe make ninik kápae sámprá yakáp námpao maok, yumo mér kárákáre fek yakápnáp kar wa nánko, am támao yinan kárákáre sápnámpon. <sup>8</sup>Yino te wae mér, yumo Tokwae Karént koumpea kárákáre yakáp napo maok, yino kor yumwan nkeaka yiki yakáp námpon. <sup>9</sup>Yino te Kwarén sér mwaria yumwan ninikria warákár tokwae námpon. Aenámpara, yino te am warákárnámpt ninik fek táman Kwarén ‘Aesio’rá sér saráp yak konámpono. <sup>10</sup>Yino te yumwan nke mwaria te ankár wae fek, tá kumuruk kor Kwarén sér saráp yak konámpon. Yumo Kwarén mér nap pwi mo nánko te, yino warko yaewouránko, yumo fwapia mér karenkria námpon.

<sup>11</sup>Yinomp ninik te, nomp Naropwar Kwar ntiaka nomp Jisas Tokwae Karao námoku yinan fwap éréképea yumonapok tirá kérép keponoria nempon. <sup>12</sup>Yinomp ninik te, Tokwae Karao yumwan yiráp ninik mek arop ankwapan nounouroup mwanap ninik kák nánko, top-pwarámpá yakanoria námpon. Aenángo maok, yumo nonopok nounouroupria, ankwap farákapan kor nounouroup napo, yino yumwan nouroup i konámptnámpt taknámpt tokwae kari yak naenámpon. <sup>13</sup>Yinomp ninik te, Kwaro yumwan takriaka kárákáre sánk nánko maok, nomp Tokwae Kar Jisas warko náráp arop ponankor éréképrá ék námp fek te, yumo nomp Naropwar Kwaro nke námp fek yiki kukur yakápria maok, mao nke námp fek nkwa maki nap yak mo naenámpon.<sup>x</sup>

**Kwaro warákár naenámpt niamp ninikaok paokop mwanámpt kar**

**4** <sup>1</sup>Ononamp fákáre, yumo Kwaro warákárnámpt kwapwe kare ninikaok paokop nap te, yino wae yumwan ponankor am ninik yénki námpara, yumo ampaok paokop napon. Aenapan maok, yino oukoumwan yumo ankár kánámpár takrá yakáp mwanapria, Jisas Tokwae Karamp e fek yiráp ninik mek kárákáre sánk námpon.

<sup>2</sup>Yumo te wae mér napon, yino yumwan farákápnámpt ponankor kar máte Jisas Tokwae karamp ninikaok farákáp námpono. <sup>3</sup>Kwaromp ninik

v 3:5 Fl 2:16 w 3:6 Ap 18:5 x 3:13 Fl 1:9-10

te arak námpon: Yumo ankár kokopor i konap ninik te pwarareaka, yiki kor ninik fek yakápenkrá ninik námpon.<sup>y</sup> <sup>4</sup>Aeria maok, yupuráp arop yumo ponankor ankár yumokuráp yupurént saráp yakápnap ninik te yiki kor yae-párák kare yakáp i konap ninik fek yakáp kip.<sup>z</sup> <sup>5</sup>Yiráp ninik te Kwarén mér monap arop niampia kokopor ninikan kikiankrá paokopi kwapono.<sup>a</sup> <sup>6</sup>Yumo te yiráp ankwapnápén, mao te Kristenara, onan yopor mo, fwaponoria maomp yupurént kwatae niniki kwapono. Am taknap arop fárákapan te Kwar Tokwaerao touwe tokwae kwatae sánk naenámpon. <sup>7</sup>Kwaro nomwan wumwiria érékép námp te apae am kokopor ninikaok paokopenkria ninámpanápe, mono. Mao nomwan wumwiria érékép námp te, ankár yiki kor ninik fek yakápenkria ninámpon.<sup>b</sup> <sup>8</sup>Aenámpara, kar yino farákáp nángo, arop am kar ták-sinámp te, mao te aropan younkwe sir mono. Kwarén younkwe sinámpon. Am Spirit Kwaro nénk námp te kwaporok spirit mwar mono. ‘Ankár Yiki Kare Spirit’rá sér i konapono.<sup>c</sup>

<sup>9</sup>Ono te yumo nonopok yiráp ankwapyaenápen nounouroup i konap ninikan kumwi mono. Am ninik te Kwaro yumwan wae yénk nángo méri yakáp napon.<sup>d</sup> <sup>10</sup>Yumo te waeman ponankor Masedonia mek mwaekamp Kristen ankwapyaenáp fárákapan takrá nounouroup napo, yino wawiaka yumwan kárákáre fek sérrá: Yumo te ankár am ninik fek saráp yakáp napo, támao tokwae yak kuno. <sup>11</sup>Yumo te ankár yino wokwaek séri námpnám taknám sánánkar tankáprá yumoku tére mwanap ninikan sámpea kárákáre kipo. Ankwapamp térean énoukouprá sérari kwapono. Yumo ankár yumokuráp yae kor fek téreteria maok, yumo fwap yumoku taokeyakáp mwanapono.<sup>e</sup> <sup>12</sup>Aenapo maok, yiráp ankank wae yumwan pwi nángo, yumo arop ankwapan ‘Yinan yaewourria fir sápenk’rá sér moria maok, Kwarén mér monap arop nke nap fek yae-párák kare paokop napo, am fárákapao yumonap ninik táman nkeaka warákár mwanapon.<sup>f</sup>

### **Jisas Tokwae warko ékria nomwan fápárámpá kák naenámp kar**

<sup>13</sup>Yinomp arop fákáre, yinomp ninik te yumo arop sumpwi nap fek épérép te mono, fwapia mérenkria námpon. Takria yumo Kwarén mér moria warko ferámp mwanap ke yépék mo i konap aropao i konapnámpon yonkwae touwe kéképrá éménka wae mwanape.<sup>g</sup> <sup>14</sup>Jisas sumpwiaka warko fárámp námp te nomo wae mér námpon. Taknám warko Jisas apárok ék námp fek te Kwarén mériaka sumpwinap arop te Kwaro warko Jisasént éréképá korop naenámpon.

<sup>15</sup>Yino Jisas Tokwae Karao naenámp karan yumwan farákáp námp te ará: Tokwae Karao koropnámpon ke fek te nomo oukoumwan yiki

<sup>y</sup> 4:3 1 Pi 1:16    <sup>z</sup> 4:4 1 Ko 6:13,15    <sup>a</sup> 4:5 Ro 1:24-28    <sup>b</sup> 4:7 1 Pi 1:15    <sup>c</sup> 4:8 Lu 10:16  
<sup>d</sup> 4:9 Jo 13:34    <sup>e</sup> 4:11 Ef 4:28    <sup>f</sup> 4:12 Kl 4:5    <sup>g</sup> 4:13 1 Ko 15:20; Ef 2:12

yakápnámp arop te sumpwinap aropan mekia tukup mono.<sup>h</sup> <sup>16</sup> Kwaro tékén wumwi kar fek sénánko, wur fokop napo, am fek ensel tokwaerao tékén wumwi nánko, Jisas Tokwae Karao námoku yámar meknámp warko ék námp fek te Kwarén méria sumpwinap aropaomékir ferámp mwanapon. <sup>17</sup> Am tak nap fek maok, nomo oukoumwan yiki yakáp námp nomwan kuri Jisas Tokwae Karao am fárakapént éréképea koumwe mek pokeanángo maok, am fek nomo Kwar Tokwae Karan kikipia maok, nomo méntér yámar mek yakápi-yakáp mwanámpon. <sup>18</sup> Ae mwanámpara, yiráp ankwapyae nápo ninik mek kárakáre sámpea warákár fek yakápanáponorá ankár mámá kar farákáp kipo.

**Nomo ankár Jisas Tokwae ék naenámp keran  
nánaprá yakáp mwanámp kar**

**5** <sup>1-2</sup> Jisas ék naenámp ke te, oukun naenámp aropao kumuruk e-poup korop konámp niampono. Am te yumoku wae mér napara, yino am ankank korop naenámp ke te sér mono.<sup>i</sup> <sup>3</sup> Ae naenámpan maok, arop ankwap fárakapao sérrá, “Oukoumwan te kwapwe kare kenono. Fwap yae-párák yakáp mwanámpono.” Aerá ninik napo, am ke fek táman yupurao táráp tank naeria arokwap konámp niamp, faokor mwanap touwe tokwaerao am fárakapan koupour korop nánko te, wouroukoup mwanap pourou mono.<sup>j</sup> <sup>4</sup> Aeno onomp kémpiyae fárakap, yumo te apae kirikip mek yakáp napan oukun arop korop nánko, korokop konapnámp taknámp, am yae korop námp nkerá korokop mwanapanápe. <sup>5</sup> Yumo ponankor yámar ntiaka wae kwapwe fekamp aropon. Nomo te kirikip ntia kumurukamp arop mono.<sup>k</sup> <sup>6</sup> Aenámpara, nomo arop ankwap fárakapao pamp i konapnámp araknámp pamp mwareano. Nomp yi te ankár firékarea yak nánko, nomp ninik te ankár érik karaok farákárano. <sup>7</sup> Nomo te waeman mér námpono, arop pamp nap te kumuruk pamp i konapon. Tá arop kwatae ént fáritea mánmánrá paokop konap te kumuruk i konapon. <sup>8</sup> Aeno nomo te wae fekamp aropara, nomo te ankár érik karaok farákár nánko, ankank youroukoupia mér mwaro. Nomo Kwarén mérnámp ninik ntiaka aropomp i konámp ninik te káraenámp yirimpea paokopria maok, tá Kwaro nomwan warko érékép naenámpria kárakáre fek yépékrá yakápnámp ninik te, kaparáp koumpnámp araknámp me korok woukwapea paokop mwanámpon.<sup>l</sup> <sup>9</sup> Kwaro nomwan nánkáráp námp te nomwan yopor nanampria nánkáráp moi námpono. Nomp Jisas Krai Tokwaerao nomwan warko érékép naenámpria nánkáráp námpono. <sup>10</sup> Jisas te nomwan yaewourrá sumpwi námpara, nomo oukoumwan yiki yakáp námp, tá nomo sumpwi námpao kor, nomo

<sup>h</sup> 4:15 1 Ko 15:51-52    <sup>i</sup> 5:1 Mt 24:36; Mt 24:40-44    <sup>j</sup> 5:3 Lu 21:34-36    <sup>k</sup> 5:5 Ef 5:8-9  
<sup>l</sup> 5:8 Ef 6:14,17

fwap méntér yiki yakáp mwanámpon.<sup>m</sup> <sup>11</sup> Ae mwanámpara, yumo te nonopok yaewour naenám kwapwe karenám kar sérar nap te, ankár yumoku oukoumwan napnám maknám, nonopok waria kárakáre sámpria warákár mwanapon.<sup>n</sup>

**Kwaro yaewour nánko, kwapwe kare ninik fek tére mwanap kar**

<sup>12</sup> Ankwapyaie fákáre, yino yumwan sénám te ará: Kwaro, sios yumwan taokeyakápenkria arop páte námpara, am fárakapao yumwan taokeyakápria yiráp ninik fwapokwap i konapara, yumo te ankár am fárakapamp yae ankore mek yakáp kipo.<sup>o</sup> <sup>13</sup> Yumo te am tére nap táman ninikria maok, yonkwae kárámprá am fárakapan warákárria, énéni ankárankamp ninik fek yakáp kip.

<sup>14</sup> Ankwapyaie fákáre, yino yumwan kar kárakáre kare fek sénám te, arak kipria námpon: Yumo te arop kokwaerá paokop nap warko éréképea fwapokwapria maok, tá arop ankwap fárakapao kor apáprá paokop napan kor taknám, kárakáre sámpnanáponoria yaewourria maok, tá ankwap fárakap fwapia kárakáre mo napan kor mént yaewour, tá arop ponankoran kor sánánkar porokwe fek tére kipo.<sup>p</sup>

<sup>15</sup> Yumwan kwatae ninik napo yumo nopok kor kwatae niniki kwapono. Yumo ankár yiráp ankwapyaenápén kwapwe kare ninik fek saráp sérarrá paokopria yaewouria maok, arop ponankoran kuri ankár tak kip.<sup>q</sup>

<sup>16-18</sup> Yumo Krai Jisasént koumpá yakáp napara, Kwaro yumwan takenkrianám ninik te ará: Yumo ankár warákár saráp yakáp, tá yumo ankár Kwarén kar toropwap saráp yakáp, tá yumwan apae-apae ankank korop námpan kor, ankár Kwarén ‘Aesio’rá sér kipo.<sup>r s t</sup>

<sup>19</sup> Yiki Kor Spiritao yiráp ninik mek tére naerianám man taokor kwapono. <sup>20</sup> Yumo te arop Kwaro maomp ninik mek sánknám profet kar farákáp nánko te, man kokwaroki kwapono. <sup>21</sup> Aeno yumo te ankár arop ponankor yumwan farákápnap kar am youroukoupia, kwapwe kare ninikan sámp-sámpria maok,<sup>u</sup> <sup>22</sup> ponankor nkwakwe make ninik kwatae nám te ankár kwe-pwar kipo.

**Kar pwarnám mwaekamp kar kánanke**

<sup>23</sup> Yonkwae porokwe fi korráp Kwaro yumwan fwap ponankor yiki kukurrá kák naenámpon. Mao námoku yiráp waemp, yiráp ninik, yiráp pourou taokeyak nánko maok, nomp Jisas Krai Tokwae Kar warko arákarrá ék nám fek nkwak maki nap yak mo, kwapwe kare yakáp mwanapon. <sup>24</sup> Kwaro námoku yumwan wumwiria érékép nám

<sup>m</sup> 5:10 Ro 14:7-9   <sup>n</sup> 5:11 Érik 20-21   <sup>o</sup> 5:12 Hi 13:17   <sup>p</sup> 5:14 2 Te 3:6,11,15  
<sup>q</sup> 5:15 1 Pi 3:9   <sup>r</sup> 5:16 Fl 4:4   <sup>s</sup> 5:17 Lu 18:1   <sup>t</sup> 5:18 Ef 4:30   <sup>u</sup> 5:21 1 Jo 4:1



te, yumwan kwaporok pwar mono. Mao námoku sérinámp ponankor karwaok i konámpara, fwap tak naerámpon.ʋ

<sup>25</sup>Yumo ‘Kwaro yinan yaewourano’rá sér kipo. <sup>26</sup>Yumo Kristenaó i konap ninik fek yiráp ankwapyaenáp fárákapan ponankor nounourouprá yae koukoupwiyak kipo.

<sup>27</sup>Mámá karan Kwaro onan sáp námpan ono yumwan kárákáre fek sér rae: Yumo má pas fekamp kar má yiráp ankwapyaenáp fárákapan ponankor farákáp kipo.

<sup>28</sup>Ono ninik namp te, Tokwae Kar Jisas Kraiso námokuráp ninik fek ankár yumwan yaewouranoria nampon.